



FYLKESMANNEN I SOGN OG FJORDANE

Sakshandsamar: Hermund Mjelstad
Telefon: 57643124
E-post: fmsfhm@fylkesmannen.no

Vår dato
27.06.2013
Dykkar dato

Vår referanse
2013/918 - 433.2
Dykkar referanse

Arne Slogvik

6887 LÆRDAL

Løyve til utsetjing av utanlandske treslag - Arne Slogvik - Lærdal kommune

Vi viser til søknad motteke her 21.02.13 om utsetjing av utanlandske treslag.

Bakgrunn

Forskrift om utsetjing av utanlandske treslag vart vedteken i statsråd 25. mai 2012. Føremålet med forskrifta er å hindre utsetjing av utanlandske treslag som kan føre til uheldige følgjer for naturmangfaldet. Forskrifta trådde i kraft frå 1. juli 2012.

Om forskrifta

Forskrifta omfattar både utanlandske treslag til skogbruksføremål og produksjon av juletre og pyntegrønt. Bruk av utanlandske treslag i hagar og parkanlegg vil bli regulert gjennom ei eiga forskrift. Direktoratet for naturforvaltning har delegert ansvaret for den nye forskrifta til Fylkesmannen.

Den nye forskrifta inneber ikkje eit forbod mot utsetjing av utanlandske treslag, men kan opne for løyve etter søknad. Norske treslag treng ikkje løyve.

Forskrifta er heimla i naturmangfaldlova, som har eit eiga kapittel (IV) som regulerer innførsel og utsetjing av framande organismar, og omhandlar også utsetjing av utanlandske treslag.

Søknaden

Arne Slogvik, Lærdal kommune, søker om utsetjing av tre for juletreproduksjon på to areal. På det eine arealet (gbnr 14/2, eigar Harald Midvoll) på 5 da skal det plantast ut ca 1000 tre av *Abies sibirica* (sibiredelgran). Arealet er eit brakklagt jordbruksområde.

Det andre arealet (gbnr 14/1, eigar Arne Slogvik) er delt i to på 3 da kvar og skal tilplantast med 100 + 100 stk *Abies nordmanniana* (nordmannsedelgran) og *Abies lasiocarpa* (fjelledelgran) i 2013. Arealet er tidlegare plantefelt.

I Artsdatabanken sin publisasjon «Fremmede arter i Norge –med norsk svarteliste 2012» er fjelledelgran vurdert til å vere av låg risiko og har relativt lite spreingspotensial. Arten er ikkje på svartelista. Nordmannsedelegran er ikkje vurdert. *Abies sibirica* er vurdert til å vere av potensielt høg risiko grunna god/stor spreingsevne/spreingspotensial. For juletreproduksjon er spreingspotensial av mindre interesse då omløpstida er relativt låg, gjerne kring 10 år.

Vurdering av søknaden etter naturmangfaldlova §§ 8-12

Kunnskapsgrunnlaget § 8

Hovudkontor
Njøsavegen 2, 6863 Leikanger
Telefon: 57 64 30 00
Telefaks: 57 65 33 02
Org.nr 974 763 907

Landbruksavdelinga
Fjellvegen 11, 6800 Førde
Postboks 14, 6801 Førde
Telefon: 57 64 30 00
Telefaks: 57 82 17 77

E-post:
fmsfpost@fylkesmannen.no
Internett:
www.fylkesmannen.no/sfj

Plantinga av juletre skjer på innmark/brakklagt areal der deler av arealet er i bruk til juletreproduksjon. I nærområdet til plantinga på gbnr 14/2 er det registrert eit område med flaummarksområde i Naturbasen. Ut frå den aktuelle produksjonen og risiko for skade på naturmangfaldet, vurderer vi kunnskapsgrunnlaget til å vere tilstrekkeleg opplyst. Vi vurderer heller ikkje at utsetjinga vil ha uheldige følgjer for naturmangfaldet, jf. nml § 4.

Føre-var-prinsippet § 9

Med dei vilkåra vi set, sjå nedanfor, ligg det ikkje føre risiko for alvorleg eller irreversibel skade på naturmangfaldet slik vi kjenner den kunnskapen som er tilgjengeleg. Føre-var-prinsippet vil difor ikkje vere aktuelt å nytte i dette tilfellet.

Økosystemtilnærming og samla belastning § 10

Juletreproduksjonen er lagt til innmark som delvis er i bruk til juletreproduksjon. Vi kjenner ikkje til at området har spesiell verdi som slåttemark eller andre former for verdifulle og truga kulturmarkstypar. Når ein sikrar at det ikkje blir frøspreiing frå feltet, vil aktiviteten difor ikkje belaste noko økosystem ut over det som er tilfelle ved vanleg drift av innmark.

Kostnader ved miljøforringing skal berast av tiltakshavar § 11

Naturmangfaldlova § 11 inneber at tiltakshavar må ta naudsynte kostnader med å sikre at det ikkje blir spreidd frø frå feltet, og at det ikkje blir ståande tre att og vekse dersom drifta av ulike grunnar skulle bli lagd ned.

Miljøforsvarlege teknikkar og driftsmetodar § 12

Denne paragrafen inneber at ein skal vurdere driftsmetodar, lokalisering m.v. for å unngå eller avgrense skade på naturmangfaldet. Det skal gjerast ei samla vurdering av tidlegare, nåverande og framtidig bruk av mangfaldet og økonomiske tilhøve som gjev dei beste samfunnsmessige resultat. Tilplanting av innmark til bruk for juletreproduksjon er eit inngrep som er reversibelt. Når ein sikrar seg at feltet ikkje har spesielle verdiar knytte til kulturlandskap, og ein sikrar seg mot frøspreiing, vil tiltaket ikkje ha vesentlege uheldige følgjer for naturmangfaldet.

Vedtak

Med heimel i naturmangfaldlova § 30 får Arne Slogvik med dette løyve til å setje ut juletre av artane *Abies sibirica* på gbnr 14/2 (5 da) og *Abies nordmannia* og *Abies lasiocarpa* på gbnr 14/1 (6 da) i Lærdal på følgjande vilkår:

1. Løyvet gjeld for denne utsetjinga og éi påfølgjande utsetjing.
2. Løyvet gjeld eigedomane gbnr 14/1 og 14/2 på lokalitetane som er avmerkt i søknaden.
3. Dette løyvet skal takast vare på hjå tiltakshavar og grunneigar. Styresmakta som har tilsyn med tiltaket skal kunne kontrollere at vilkåra blir følgde og at utsetjinga er lovleg.
4. Den som har fått løyve etter forskrifta skal etablere og dokumentere internkontroll etter § 10 i forskrifta.
5. Dersom eigedomen blir overdradd til andre, pliktar eigar å informere ny grunneigar om løyvet og vilkår som er sette for å hindre spreining.
6. Skraptre og liknande som ikkje kan nyttast i juletreproduksjonen, skal vere fjerna når eit ordinært omløp for juletreproduksjonen er avslutta.

7. Utsetjing på dyrka mark krev løyve til omdisponering frå kommunen.
8. Den ansvarlege for utsetjinga skal varsle Fylkesmannen dersom det oppstår skade, eller fare for alvorleg skade, på naturmangfald i samband med utsetjing eller drift av juletreffeltet.
9. Dersom drifta av ulike grunnar skulle ta slutt utan ordinær innhausting, skal grunneigar varsle styresmakta som har tilsynsansvaret. Dersom ikkje grunneigar ønskjer å rydde feltet sjølv, kan styresmakta som har tilsynsansvaret rydde feltet for grunneigar si rekning.
10. Dette løyvet kan opphevast eller endrast i samsvar med naturmangfaldlova § 67.

Klagerett

Vedtaket kan påklagast til Direktoratet for naturforvaltning innan 3 veker, jf. forvaltningslova. Ei eventuell klage skal sendast til Fylkesmannen.

Med helsing

Dag Endre Stedje
seniorrådgjevar

Hermund Mjelstad
seniorrådgjevar

Brevet er elektronisk godkjent og er utan underskrift

Kopi pr. e-post: Lærdal kommune
Sabima
WWF